

Protocol

**dalla radunonza generala dalla Surselva Romontscha (SR),
venderdis, ils 29 da matg 2015 allas 20.00 uras
ella casa cumin a Glion**

Tractandas:

1. Avertura e beinvegni
2. Tscharna dils dumbravuschs
3. Protocol
4. Rapport annual 2014
5. Rendaquen 2014
6. Fixar la contribuziun annuala
7. Elecziuns e nominaziun
 - a) remplazzament d'in suprastont
 - b) remplazzament da dus suppleants
 - c) remplazzament d'in revisur
 - d) nominaziun d'in suprastont/a Lia Rumantscha
8. Program da lavur 2015
9. Varia

1. Avertura e beinvegni

Il president dalla SR Vitus Gartmann arva la radunonza fagend in cordial beinvegni a tuts presents. Grond plascher fa era la presenza dils representants dalla vischnaunca da Glion, dallas medias e dalla politica. Il president ha retschiert differentas perstgisas. D'ina prelecziun da talas less el desister - admetta denton in engraziament per lur interess ed engaschi.

Tier la gliesta da tractandas propona la suprastonza d'augmentar la tractanda 7 cun 7 c) remplazzament d'in revisur. La midada vegn approbada unanimamein.

Roman Cantieni beneventa medemamein ils presents ed admetta era el num dalla suprastonza da Glion in cordial beinvegni. El menziunescha l'impurtonza dalla vischnaunca da Glion pigl intschess romontsch en Surselva, mo era l'impurtonza che la vischnaunca less dar al romontsch. Aschia numna el differentas midadas ch'ei vegnidas fatgas ell'administraziun che muossan la promptadad da promover il romontsch en vischnaunca. En connex cun la nova lescha da lungatg engrazia signur Cantieni alla Lia Rumantscha mo era alla Surselva Romontscha per la buna collaboraziun.

2. Tscharna dils dumbravuschs

Paul Valentin Solèr e Martin Cabalzar vegnan elegi sco dumbravuschs.

3. Protocol

Il protocol dalla radunanza generala 2014 ei publicaus silla pagina d'internet dalla SR, www.surselva-romontscha.ch, ultra da quei vegn el projectaus vid la preit. Il protocol vegn approbaus unanimamein.

4. Rapport annual 2014

Il president Vitus Gartmann menziunescha che la suprastanza dalla SR ei sentupada nov gadas a sesidas usitadas e nov gadas han consuprastonts frequentau sesidas extraordinarias. Bugen rapportescha el dil curriu e passau.

Contribuziuns vischnaucas: Sin fundament dalla decisiun dalla davosa radunanza generala ha la suprastanza elaborau in niev model per la contribuziun dallas vischnaucas e mess en vigur tal. Quei model ei gia secumprovas.

Extrada Domat: La vischnaunca politica da Domat ha visau il commembradi dalla SR e vegn daniev remplazzada dall'acziun romontscha da Domat. Sin quella moda e maniera san ils ligioms romontschs vegnir tgirai vinavon cun representants interessai ed engaschai dil Plaun.

Ilanz/Glion: Ella vischnaunca da Glion ein la *lescha davart ils lungatgs officials* e la *lescha davart la promoziun dil lungatg romontsch* vegnidas elaboradas ed approbadas. Quei process - cun grond engaschi dalla LR - ha la SR observau agl ur. Per in prosperar fritgeivel da nies lungatg-mumma ein las premissas politicas vegnidas realisadas e fuorman pigl avegnir ina buna basa per in saun svilup e manteniment dil romontsch ella vischnaunca da Glion. Ussa schai ei els mauns dalla populaziun romontscha d'esser digns da nossa ierta linguistica romontscha.

Plan d'instrucziun 21: Il PI21 ei vinavon ina incumbensa permanenta, delicata e pretensiusa. La posiziun dalla SR pertuccont il PI21 ei e resta la medema sco communicada e surdada a sias uras a cusseglier guvernativ Martin Jäger. La finamira actuala ei da surdar els proxims dis alla Regenza Grischuna ina posiziun comunabla culla Lia Rumantscha, la Pro Idioms Surselva, la Conferenza generala Surselva, la Surselva Romontscha e las vischnaucas.

Ediziuns: Sper tut il suranumnau ei la promoziun, la tgira ed il manteniment dalla litteratura e cultura romontscha segiramein il coc e deletg dallas incumbensas dalla SR. En quei senn ha la SR susteniu, promoviu e sviluppau differents projects. En special ei il cudisch da lectura per il scalem miez en fuorma d'ina translaziun dil cudisch „Vamperl“ cuort avon la finiziun e vegn a cumparer el decuors dils proxims meins. Cun novs cullis e buttuns cun logos romontschs emprova la SR da rinforzar la preschientscha romontscha el mintgadi.

In cordial engraziament admetta il president a tuttas e tuts consuprastontAs per lur grond engaschi e la buna collaboraziun, sco era a tuttas ed a tuts che s'engaschan per nies lungatg e nossa cultura.

5. Rendaquen 2014

Il cassier Carl Caflisch presenta il quen ed explichescha las singulas posiziuns. Il quen siara cun entradas da CHF 46'919.05 ed expensas da CHF 25'116.10, pia cun in gudogn da CHF 21'802.95.

Paul Valentin Solèr propona d'approbar il quen sco presentaus ed engrazia al cassier per sia lavur. Silsunter vegn il quen approbaus unanimamein.

6. Fixar la contribuziun annuala

La suprastonza propona da schar las contribuziuns sco tochen dacheu:

- commembers singuls CHF 30.-
- secziuns/pleivs/uniuns CHF 50.-
- persunas giuridicas CHF 100.-

Quella proposta vegn acceptada unanimamein.

Las contribuziuns per vischnauncas ein vegnidas fixadas el 2014 per in in cuoz da 5 onns e stattan buc en votaziun.

7. Elecziuns

a) remplazzament d'in suprastont

Simon Bundi ha demissiunau sco suprastont. La suprastonza propona Rita Bearth da Fuorns. Ella vegn elegida unanimamein.

b) remplazzament da dus suppleants

Entras las demissiuns da Franziska Willi Weggler e Bistgaun Cathomen ein dus posts da suppleants vacants. La suprastonza propona d'eleger Albert Spescha e Ladina Friberg. Els vegnan elegi unanimamein.

c) remplazzament d'in revisur

Signur Paul Valentin Solèr ha demissiunau sco revisur. La suprastonza propona Nicole Casaulta-Battaglia sco nova revisura dalla SR. Ella vegn elegida unanimamein.

d) nominaziun d'in suprastont/a Lia Rumantscha

La radunonza generala ha l'incumbensa da nominar in candidat/a per la suprastonza dalla LR. L'elecziun ha liug igl october 2015 entras tut ils delegai dalla LR. Rino Darms stat a disposiziun per in'ulteriura perioda en suprastonza dalla Lia Rumantscha. Signur Dr. Alexander Maissen proponan da nominar signur Donat Nay da Zignau per l'elecziun en suprastonza dalla LR. Ei vegn fatg scrutini, cedels reparti 79. Cun 69 vuschs vegn signur Donat Nay nominaus sco suprastont dalla Lia Rumantscha. Rino Darms obtegn 10 vuschs, auters 0, cedels vits 0, cedels nunvaleivels 0.

8. Program da lavur 2015

Igl agir sin palancau politic vegn segir era vinavon ad esser ina impurtonta incumbensa dalla Surselva Romontscha. En spezial il plan d'instrucziun 21 vegn a fatschentiar nus era vinavon.

Sper la lavur politica ha la Surselva Romontscha era l'incumbensa da promover la litteratura e la cultura romontscha. En quei senn essan vid elaborar ils suandonts projects:

Vamperlin: La translaziun dil cudisch da lectura "Vamperlin" ei gest terminada e nus quintein cun ina publicaziun dil cudisch el decuors da questa stad.

Restampa da cudischs exausts: Il cudisch "Romontsch - ina schanza unica" cuntegn poesias e canzuns per affons pigns. Il cudisch cun disc cumpact vegn restampaus proximamein. Il cudisch "Aunghel, lieur, capetscha da miserocla e 24 historias d'Advent" ei medemamein exausts e vegn restampaus avon igl advent 2015.

Cullis e buttuns: Gest arrivai ein ils cullis e buttuns cun inscripziun romontscha. Ils buttuns vegnan reparti allas fatschentas interessadas en Surselva. Finamira ei che Romontschs plidentien in l'auter pli savens en lur lungatg-mumma.

Nies Tschespet 76: Adina puspei vegn la suprastonza dalla SR plidentada arisguard l'ediziun d'in ulteriur Tschespet. Il davos Tschespet ei cumpariu igl onn 2009. La suprastonza less edir il proxim Tschespet el decuors digl onn 2016. Ina idea concreta ei gia avon maun, denton aunc buc elaborada.

Davart dils commembers dat ei neginas propostas ed il program da lavur 2015 vegn approbaus unanimamein.

9. Varia

Patricia Cadruvi presenta siu eBook e cudisch da cuschinar ch'ei vegnius sustenius denter auter era dalla SR. Interessai san cumprar il cudisch *mintgin_cuschin* suenter radunonza.

Conradin Klaiss sepresenta sco niev commember dalla direcziun dalla LR (menader formaziun ed Inplus) e numna entginas da sias incumbensas. El porta en num da Urs Cadruvi ils megliers salids dalla Lia Rumantscha. Signur Klaiss menziunescha era ils cuors da stad da romontsch sursilvan (FRR) che han liug uonn per l'emprema gada a Glion ed engrazia alla vischnaunca da Glion per lur sustegn finanziel.

Donat Nay engrazia per sia nominaziun cun maioritad sorprendenta. El ha grond plascher e sincera da s'engaschar cun forza per saver ademplir ils giavischs dalla SR.

Allas 21:00 uras siara il president Vitus Gartmann la radunonza generala engraziand per il sustegn ed engaschi da tut ils presents e sperond sin ina fritgeivla collaboraziun era egl avegnir.

Suenter radunonza envida la vischnaunca da Glion ad in aperitiv.

Laax, ils 20 da zercladur 2015

l'actura
Flurina Cantieni